

Evening Dogri (NSD) Bulletin 08-09-2024

आकाशवाणी

खास खास खबरां

- 1 रक्षा मंत्री राजनाथ सिंह होरें आखेआ जे बीजेपी जिन्ना चिर सत्ता च ऐ ओ दफा 370 गी परतियै ब्हाल नेई होन देग ते जम्मू कश्मीर गी भारत दे अब्बल राज्यें च शूमार होने काबल बनाई देग।
- 2 अबूधावी दे क्राउन प्रिंस भारत दी त्रऊं दिनें दी यात्रा पर अज्ज नमीं दिल्ली पुज्जे।
- 3 सूचना ते प्रसारण मंत्री अश्विनी वैष्णव होरें गी टाइम मैगजीन आस्सेआ तकनीक ते आर्टिफिशन इंटेलीजेंस दे क्षेत्र च मता प्रभावत करने आले व्यक्ति दे तौरा पर दस्सेआ गेआ ऐ।
- 4 एकीकृत रक्षा स्टाफ मुख्यालय त्रौनें सेनाएं दे अधिकारिणं लेई पैहला संयुक्त परिचालनसमीक्षा ते मूल्यांकन कार्यक्रम कल थमां नमीं दिल्ली च आयोजित करोग।
- 5 तथ्यें दी जांच करने आली इकाई पीआईबी नै पीएम कुसुम योजना च पंजीकरण लेई 8 ज्हार रपे फीस लैने आले धोखाधड़ी थमां लोकें गी आगाह कीता ऐ।
- 6 भारत नै पैरिस पैरालंपिक्स 2024 च तगमे दी गिनतरी दा रिकार्ड बनांदे होई इतिहास रचेआ ऐ।

<><><><><><>

JK-Rajnath Singh

केन्द्री रक्षा मंत्री राजनाथ सिंह होरें कांग्रेस पार्टी दे उस दावे जे दफा 370 गी ब्हाल करी दित्ता जाग दी दी नुख्ताचीनी कीती ऐ। उनें दोहराया जे जिसलै तगर बीजेपी सत्ता च ऐ, इसगी परतियै ब्हाल नेई कीता जाई सकदा। सिंह होरें जम्मू कश्मीर च होई दी प्रगति ते मजूदा स्थिति गी बनाई रखने त्रिति अपनी वचनबद्धता गी जाहर कीता। रक्षामंत्री होरें रामबन च इक रैली गी संबोधत कीता। उनें आखेआ जे मुख्य दे अलावा दुनिया भरै दे लोक जम्मू कश्मीर दे चुनाएं पर नेड़मी तक्क रखा'रदे न। रक्षा मंत्री होरें दफा 370 ते 35ए दे हटने मगरा मतदान गिनतरी च होए दे बाद्धे बारे बी गल्ल कीती। उनें आखेआ जे मतदान फीसद च खासा बाद्धा दिक्खेआ गेआ। राजनाथ सिंह होरें बीजेपी दी अगुवाई आली केन्द्र सरकार आस्सेआ खित्ते च शांति ते रमानदारी ब्हाल करने दी गल्ल कीती ते कांग्रेस दे दफा 370 सरबंधी दावे दा खंडन कीता। सिंह होरें आखेआ जे जम्मू कश्मीर जेहड़ा आतंकवाद लेई जानेआ जंदा हा, हुन विकास ते सैलसफा लेई जानेआ जा'रदा ऐ।

<><><><><><>

BJP Campaign

पैहले गेड़ लेई नामांकन भरने आली पूरी प्रक्रिया दे मुकम्मल होने ते विधानसभा चुनाएं दे दुए गेड़ लेई नामांकन पत्रें दी जांच आला कम्म मुक्कने मगरा जम्मू कश्मीर च चुनावी गतिविधियां रफतार फगड़ा'रदियां न। बीजेपी नै विधानसभा चुनाएं च अपनी पार्टी दे मेदवारें दे पक्ख च व्यापक प्रचार अभियान रंभ कीता ऐ। रक्षा मंत्री राजनाथ सिंह होरें रामबन ते बनिहाल च अज्ज सार्वजनिक रैलिएं गी संबोधत कीता। अजें तगर 2 राष्ट्रीय नेता केन्द्री गृहमंत्री अमित शाह ते लोकसभा च विपक्ष दे नेता राहुल गांधी होरें जम्मू कश्मीर दा दौरा लाया ऐ। औने आले हफते च केन्द्र शासत प्रदेश च केई सारे राष्ट्रीय नेता चुनां प्रचार लेई औंगन। पैहले गेड़ तैहत इस म्हीने दी 18 सितम्बर गी वोट पाए जाने न। प्रधानमंत्री नरेन्द्र मोदी , बीजेपी अध्यक्ष जे.पी.नड्डा, केन्द्री मंत्री शिवराज सिंह चौहान,

नितिन गडकरी, मनोहर लाल खट्टर, जी.केशन रेड्डी ते होर दुए बड्डे नेता चुनां प्रचार करगंन। दुए गेड़ तैह्त मतदान 25 सितम्बर गी होना ऐ ते त्रीए गेड़ तैह्त मतदान पैहली अक्टूबर गी होग। नतीजे दी घोषणा 9 अक्टूबर गी कीती जाग।

<><><><><><>

BJP List

भारतीय जनता पार्टी नै औंदे विधानसभा चुनां गी दिक्खदे होई 10 मेदवारें दी सूचि जारी कीती ऐ। जम्मू शहर दे बाहू विधानसभा हल्के थमां विक्रम रंधावा होरें गी, कठुआ थमां भारत भूशण, बिश्नाह थमां राजीव भगत, मढ थमां सुरेन्द्र भगत ते उधमपुर पूर्व थमां आर.एस.पठानिया, हंदवाड़ा थमां गुलाम मोहम्मद मीर, बांडीपोरा थमां नसीर अहमद लोन होरें गी मेदवार बनाया ऐ। तोआई नैशनल कांफ्रेंस नै बी 4 विधानसभा हल्के लेई अपने मेदवारें दे नां दी घोशणा कीती ऐ। सुनील वर्मा होर उधमपुर पूर्व थमां सुभाष चन्द्र आजाद, कठुआ थमां राजेश पड़गोत्रा होरें गी, विजयपुर थमां ते जोगिन्दर सिंह होरें गी नगरोटा थमां मेदवार बनाया गेआ ऐ।

<><><><><><>

Nominations

साबका मंत्री ते उधमपुर थमां बीजेपी मेदवार पवन गुप्ता होरें कल पैहली अक्टूबर गी त्रीए गेड़ तैह्त होने आले चुनाएं लेई नामांकन भरेआ। त्रीए गेड़ लेई अधिसूचना 5 सितम्बर गी जारी कीती गेई ही। नामांकन भरने दी खीरी तरीक 12 सितम्बर ऐ। नामांकन पत्रें दी जांच आला कम्म अगले दिन कीता जाग। नामांकन वापस परताने दी खीरी 17 सितम्बर ऐ। त्रीए ते खीरले गेड़ लेई जम्मू खित्ते दे दे 24 विधानसभा हल्के लेई वोट पाए जाने न। जिंदे चा जम्मू खित्ते दियां 11, कठुआ दियां 6, उधमपुर दियां 4 ते सांबा जिले दियां 3 सीटां शामिल न। कांग्रेस नै अजें तगर 24 सीटें लेई अपने मेदवारें दे नां दी घोशणा नेई कीती ऐ। अज्ज

ऐतवार ऐ मेद ऐ जे कल थमां एह प्रक्रिया होर रफतार फगडोग। कांग्रेस पार्टी अपने मेदवारें दे नां दी सूचि जारी करोग।

<><><><><><>

Abudhabi

अबूधाबी दे क्राउन प्रिंस शेख खालिद बिन मोहम्मद बिन जायद अल नाहयान होर भारत दी त्रऊं दिनें दी यात्रा पर अज्ज नमीं दिल्ली पुज्जी गे न। केन्द्रीय बपार ते उद्योग मंत्री पीयूष गोयल होरें ब्हाई अड्डे पर उंदा सुआगत कीता। क्राउन प्रिंस हुंदी भारत दी एह पैहली यात्रा ऐ। उंदे कन्नै संयुक्त अरब अमीरात दे केई मंत्री ते बपार शिष्षमंडल बी आया ऐ। ओहू कल प्रधानमंत्री नरेन्द्र मोदी हुंदे नै मलाटी करगंन ते दपक्खी सैहयोग दे केई मुद्दे पर सोच बचार करगंन। क्राउन प्रिंस हुंदा राष्ट्रपति द्रौपदी मुर्मू हुंदे नै बी मिलने दा कार्यक्रम ऐ।

<><><><><><>

Ashvani

सूचना ते प्रसारण मंत्री अश्विनी वैष्णव होरें गी टाईम मैगजीन नै प्रौद्युगिकी ते आर्टिफिशल इंटैलीजेंस दे खेत्तर लेई सारे शा प्रभावशाली लोकें दी सूचि च शामिल कीता ऐ। श्री वैष्णव हुंदा नां इस सूचि दी “शैपरस” श्रेणी दे अंतर्गत आया ऐ। पत्रिका च लिखेआ गेआ ऐ जे उंदी अगुवाई च भारत अगले 5एं बरें च सैमी कंडक्टर दे निर्माण लेई शीर्ष पंज मुखें च शामिल होई सकदा ऐ। एहदे च आखेआ गेआ ऐ ते आधुनिक आर्टिफिशन इंटैलीजेंस सिस्टम लेई मुख्ख पुर्जे दे निर्माण दा कम्म केई कारखानें च शुरू होई गेदा ऐ। सूचना ते प्रसारण मंत्रालय नै आखेआ ऐ जे श्री वैष्णव हुंदा नां इस सूचि च शामिल होना इक महत्व आली गल्ल ऐ। इस सूचि च गूगल दे सीईओ, सुंदर पिचाल, माइक्रोसाफ्ट सीईओ, सत्यानदेला, ओपन सीईओ शाम अल्टमेन, मेटा सीईओ मार्क जुर्कबर्ग ते इनफोसियोस को-फाउंडर नाहदन नीलेकाही दा नां शामिल ऐ।



Defence

एकीकृत रक्षा स्टाफ मुख्यालय कल थमां दिल्ली च त्रौनें सेनाएं दे अधिकारिएं लेई “पैहला संयुक्त परिचालन समीक्षा ते मूल्यांकन” कार्यक्रम आयोजित करोग। इस 5 रोजा कार्यक्रम गी त्रौनें सेनाएं दे मेजर जनरल ते उंदे बरोबर दे अधिकारिएं दे कन्नो कन्नी रक्षा, विदेश ते गृह मंत्रालये दे अधिकारिएं लेई आयोजित कीता जा'रदा ऐ। कार्यक्रम दा मकसद रणनीतिक योजना बनाना, भविष्य दे खतरें, चुनौतिएं ते संघर्षे दा अनुमान लाना ते उंदे प्रति आपूं गै तैआर करना ऐ। एह कार्यक्रम परिचालन लेई मुआफक माहौल तैआर करने लेई बक्ख-बक्ख सेवाएं बश्कार तालमेल गी बढ़ावा देग। एहदे च हर रोज बक्ख-बक्ख विषये पर, 30 बक्ख-बक्ख स्पीकरें ते माहिरें आस्सेआ पैनल पर चर्चा ते लैक्चर आयोजित कीते जांगन।



AP CM Governor Flood Situation

आंध्रप्रदेश दे मुख्मन्त्री एन.चन्द्रबाबू नायडू होरें अज्ज विजयवाड़ा च राजभवन च राज्यपाल एस.अब्दुल नजीर हुंदे नै मलाटी कीती। मुख्मन्त्री होरें राज्य च विजयवाड़ा ते होर दुइएं थाहरें भारी बरखा करी पुज्जे दे नुक्सान ते हाड़ आले हालात बारे गवर्नर होरें गी दस्सेआ। इस दरान सरकार आस्सेआ 24 घैंटे राहत ते बचाह कम्में बारे बी जानकारी दित्ती गई। गवर्नर होरें राहत कम्में ते कारवाई पर मुख्मन्त्री हुंदे आस्सेआ आपूं तक्क रखने दी बड़ेवाई कीती ते मेद बननी जे हालात तौले गै सामान्य होंगन।



PIB Facts

प्रेस सूचना ब्यूरो पीआईबी दी तथ्य जांच सरबंधी इकाई नै इक नेह धोखाधड़ी दे प्रति लोकें गी सौहगा कीता ऐ जेहदे च जालसाज, प्रधानमंत्री कुसुम योजना तैहत पंजीकरण फीस दे रूपे च 8 जहार रपे दी मंग करा'रदे न। तथ्य जांच इकाई नै आखेआ जे लोकें गी जाली पत्र भेजे जा'रदे न, जेहदे च आखेआ गेआ ऐ जे इस योजना दे तैहत उंदी दरखास्त पंजीकरण फीस देने मगरा मंजूर कीता जाग। सरकार नै इस चाल्ली दे कुसै बी दावे गी खारज कीती ऐ ते आखेआ जे एह पत्र फर्जी न। नवीन ते नवीकरण ऊर्जा मंत्रालय नै सलाह दित्ती ऐ जे पीएम-कुसुम योजना च दिलचस्पी रखने आले लोकें गी पैसे जमा करने जां व्यक्तिगत सूचना सांझा करनी चाहिदी। योजना लेई पात्रता ते ओह अमलावरी कन्ने जुड़े दे विस्तृत सूचना मंत्रालय दी वैबसाइट PMKusumMNRE.gov.in ते टोल फ्री नंबर 1800-180-3333 पर उपलब्ध ऐ।



Paralympics

पैरिस पैरालंपिक 2024 दा अज्ज चिरें रातीं समापन होइ जाग। भारत लेई एह पैरालंपिक्स इक ऐतिहासक पैरालंपिक्स रौहग, की जे इस पैरालंपिक्स च भारत नै शैल प्रदर्शन करदे होई मते तगमें जित्ते न। भारत नै इस पैरालंपिक्स च 29 तगमें जित्ते न, जिंदे च 7 सुन्ने दे, 9 चांदी ते 13 कैह दे तगमे शामिल न। भारत तगमें जित्तने दी सूचि च 16में थाहर उप्पर रेआ ऐ। समापन समारोह फ्रांस नैशनल स्टेडियम " द शेड दे फ्रांस" च होग। समापन समारोह च जैज म्यूसिक, थेमेटिक डांस ते मन्ने परमन्ने दे लोकें दे भाषण होंगन। समापन समारोह च सुन्ने दा तगमा जित्तने आले तीरांदाज हरविंदर सिंह ते सपरितर प्रेथी पाल होर झंडा लेइयै दल दी अगुवाई करगंन। इस परेड मगरा पैरिस अधिकारिक तौरा पर बैटन लॉस एंजिल्स गी देई देग। जेहड़ा 2028 ब'रें दे अगले पैरालंपिक्स सम्मर गेम्स दा आयोजक ऐ।



IMD

भारती मौसम विभाग नै तटीय आंध्रप्रदेश ते ओडिशा लेई अज्ज मती भारी बरखा बरने लेई खबरदार कीता ऐ। आकाशवाणी समाचार कन्ने गल्लबात करदे होई भारती मौसम विभाग दे साईनटिस्ट आर.के.जीनामणि होरें आखेआ जे छत्तीसगढ़ ते झारखंड च बी कल तगर भारी बरखा बरी सकदी ऐ। मोसम विभाग नै मध्य प्रदेश दे किश हिस्सें च कल लेई ओरेंज अलर्ट बी जारी कीता ऐ। मौसम विभाग नै आखेआ ऐ जे अज्ज दिल्ली-एनसीआर खित्ते च बी हल्की थमां दरमेयाने दर्जे दी बरखा बरने दी संभावना ऐ।



President

राश्ट्रपति द्रौपदी मुर्मू होरें कल लखनऊ च इक इमारत दे ढोहने कन्नै मारे गेदे लोकें परोआर कन्नै अपनी दिली हमदर्दी जाहर कीती ऐ। प्रधानमंत्री नरेन्द्र मोदी होरें हादसे च मारे गेदे हरेक माहनू दे नेड़में, सगे सरबंघिएं गी 2-2 लक्ख रपे देने दी घोषणा कीती ऐ। जखिएं गी 50-50 ज्हार रपे दित्ते जांगन। सोशल मीडिया दी इक पोस्ट च प्रधानमंत्री होरें इस हादसे पर बसोस बुज्जेआ ऐ ते जखिएं दे तौले नरोए होने दी कामना कीती ऐ।

